

մայնքի անդամներից, առավել ևս նրա շար կանանցից, եթե որսը ճանապարհին տրվում էր ոչ միայն ամեն համագյուղացու, այլ ամեն պատահողի, այս ամենը կարող էր բխել կենդանիների պաշտպան ոգիների վրեժխնդրության երկյուղից: Որսից բաժին հանելով ամեն պատահողի՝ նրան կաշառում էին: Նույնպես և հարևաններին, որ նրանք չխոսեն որսի մասին, մանավանդ այդ որսի մասին չիմանան շար կանայք, որոնք մի որոշ կապ են պահպանում առհասարակ ոգիների, նաև կենդանիների ոգիների հետ և կարող են գրգռել նրանց վրեժխնդրությունը: Կենդանական աշխարհը չի կտրվում մարդկային աշխարհից, այնտեղ էլ պահանջվում էր հարազատի համար վրեժխնդրություն, ինչպես դա պահանջվում էր. բոլոր երկրներում նախնական մարդկային հասարակության մեջ: Զանգեզուրումն էլ հաճախ պատմում են, ինչպես և Լոռում<sup>66</sup>, թե որսի ժամանակ հանկարծ որսորդի առջև կանգնել է մեկը ու կանչել. «Ո՛ւր ես խփում իմ եղնիկին»: Նաև այդ պաշտպան ոգուց ծածուկ մնալու համար է, որ որսի գնալիս ճանապարհին և հենց որսի միջոցին չպետք է խոսել, չպետք է ընկերոջ անունը տալ, որսն էլ պետք է ծածուկ պահել, մանավանդ շար կանանց աչքից և լեզուներից, որսի այսպես կամ այնպես ամեն մի վկա պիտի մի բաժին ստանալով կաշառվի ու մեղսակից դառնա որսորդին և լռի:

### Ա Յ Գ Ե Կ Ո Ր Ծ Ո Ւ Թ Յ Ո Ւ Ն

Այգիների տարածությունը Զանգեզուրում շատ փոքր է եղել: Սիսիանի և Գորիսի շրջաններում պտղատու ծառերը և մասամբ խաղողի որթը պատահում էին միայն խոր ձորերի հատակներին, որտեղ ծառերը պաշտպանված էին քամիներից և ցրտից: Կտպանում պտղատու ծառերն ու խաղողի որթը տնկված էին ավելի բաց մակերեսների վրա, բայց այստեղ էլ այգիներն ու պարտեզները շատ սահմանափակ տարածություն էին բնուում: Թվում է, թե դա է պատճառներից մեկը, որ Զանգեզուրում պաշտվող սուրբերի մեջ Աստվածածնի պաշտամունքը շատ թույլ էր ներկայացված, որչափ կարելի է դատել այն հանգամանքից, որ նրա անունով եկեղեցիներ շատ քիչ են պատահում (Դարաբաս, Բոնակոթ, Շինուհայր): Նկատված է, որ, օրինակ՝ Արարատյան դաշտում բոլոր այն վայրերում, որտեղ այգեգործությունը գյուղատնտեսության գլխավոր ճյուղն է, սկսած Աշտարակից մինչև Ագուլիս և նույնիսկ Մեղրիում, գրեթե բոլոր եկեղեցիները նվիրված էին Աստվածածնին, որի տոնի հետ էր կապված նաև խաղող օրհնելու օրը, որն այնտեղ կատարվում էր առանձին հանդիսավորությամբ և խոշոր հասարակական տոնախմբության բնույթ էր կրում:

Խաղողի որթի համար Զանգեզուրն իր տեղական անունն ունի՝ կոէղնի<sup>67</sup>:

<sup>66</sup> Տե՛ս Լուճ. Քումանյանի «Եղնիկի տերը»: Այսպիսի ոգիներ ունեն սվանները՝ Ափսաս կամ Ափսասսի և Դալ, արխաղները՝ Աժվէփշաբ, օսերը՝ Ավսաթի, շերբեզները՝ Մազիթի:

<sup>67</sup> Տե՛ս՝ Март Н. Я., Фрако-армянский Sabadziot и Aswat и сванское божество охоты, „Известия“ АН, 1912 г., № 13.

<sup>67</sup> Թրքերի մոտ՝ բաննիգ: Այլ պտուղներից բուծվում էին տամբուլ՝ սալոր, եղուպուր՝ ընկույզ, տիզիմ՝ կաղին, խնձօր, տանձ, գիլնա, գիլնաթի՝ բալ: Պտուղը քաղելու համար ճյուղը կոտրում են կէրչանավ—ոստի կեսը կտրած կեռածայր ճիպոտով: